



Broj: 16-12-16-5018- *9* /21  
I. Sarajevo, *23.08* 2021. godine

Na osnovu člana 8. stav (2) tačka h) Zakona o Državnoj agenciji za istrage i zaštitu („Službeni glasnik BiH“, br. 27/04, 63/04, 35/05, 49/09 i 40/12), člana 70. st. (1), (2), (3) i (6) Zakona o javnim nabavkama („Službeni glasnik BiH“, broj 39/14), člana 9. stav (2) Pravilnika o uslovima i načinu korištenja e-aukcije („Službeni glasnik BiH“, broj 66/16) i Izvještaja o toku i završetku e-aukcije od 03.08.2021. godine, na preporuku Komisije za nabavke za potrebe Državne agencije za istrage i zaštitu u 2021. godini broj 16-12-16-5018/21 od 12.08.2021. godine, u postupku javne nabavke usluga održavanja liftova za potrebe Državne agencije za istrage i zaštite, direktor Državne agencije za istrage i zaštite, d o n o s i

### ODLUKU

o izboru najpovoljnijeg ponuđača u postupku javne nabavke usluga održavanja liftova za potrebe Državne agencije za istrage i zaštite

#### Član 1.

U postupku javne nabavke usluga održavanja liftova za potrebe Državne agencije za istrage i zaštite (daljem tekstu: Agencija), putem Konkurentskog zahtjeva za dostavljanje ponuda, korištenjem e-aukcije, na preporuku Komisije za nabavke za potrebe Državne agencije za istrage i zaštitu u 2021. godini broj 16-12-16-5018/21 od 12.08.2021. godine, ugovor na period od dvije godine, dodjeljuje se ponuđaču „LIFTMONT“ d.o.o. Sarajevo, ponuda broj 16-12-16-5018-7/21 od 26.07.2021. godine, za ponuđenu cijenu u iznosu od 945,00 KM bez uračunatog PDV-a, umanjene prema rezultatima e-aukcije.

#### Član 2.

Odabrani ponuđač je obavezan da vrši uslugu mjesečnog održavanja i servisiranja 4 lifta po cijeni usluge iz člana 1. ove odluke.

#### Član 3.

Ova odluka se dostavlja ponuđačima najkasnije u roku od sedam dana od dana donošenja Odluke, uz istovremeno objavljivanje na internetskoj stranici Agencije.

#### Član 4.

Za izvršenje ove odluke zadužuje se Sektor za materijalno-finansijske poslove Agencije.

#### Član 5.

Ova odluka stupa na snagu danom donošenja.

## O b r a z l o ž e n j e

Odlukom direktora Agencije broj 16-12-16-5018-1/21 od 30.06.2021. godine pokrenut je postupak javne nabavke usluga održavanja liftova za potrebe Agencije, procijenjene vrijednosti 15.000,00 KM bez uračunatog PDV-a, za koje je obavještenje o javnoj nabavci objavljeno na Portalu javnih nabavki broj 1161-7-2-189-3-62/21 od 14.07.2021. godine. Novčana sredstva za realizaciju navedene nabavke obezbijedena su u okviru budžetskih sredstava za 2021. godinu, na osnovu Odluke o privremenom finansiranju institucija Bosne i Hercegovine i međunarodnih obaveza Bosne i Hercegovine za period april-juni 2021. godine („Službeni glasnik BiH“, broj 22/21) i Dokumenta okvirnog budžeta 2021. - 2023. godina. Za navedeni postupak javne nabavke predviđena je e-aukcija u skladu sa odredbama Pravilnika o uslovima i načinu korištenja e-aukcije („Službeni glasnik BiH“, broj 66/16) (u daljem tekstu: Pravilnik).

Obzirom da je tačkom 6. Konkurentskog zahtjeva navedeno da je rok za dostavljanje ponuda 26.07.2021. godine do 13,00 sati, te da se ponude dostavljaju u zatvorenoj koverti, Komisija je dana 26.07.2021. godine u 14,00 sati izvršila javno otvaranje ponuda prema datumu i vremenu prijema, numerišući kovertu. Javnom otvaranju ponuda prisustvovao je ovlašten predstavnik ponuđača „LIFTMONT“ d.o.o. Sarajevo.

Blagovremeno su dostavljene ukupno dvije ponude i to:

R/B	Naziv ponuđača	Ponuđena cijena bez uračunatog PDV-a
1.	„OTIS LIFTOVI“ d.o.o. Sarajevo	14.400,00 KM
2.	„LIFTMONT“ d.o.o. Sarajevo	14.976,00 KM

Komisija je nakon otvaranja ponuda u smislu člana 63. st. (5) i (6) Zakona o javnim nabavkama („Službeni glasnik BiH“, broj 39/14) (u daljem tekstu: Zakon), sačinila Zapisnik o otvaranju ponuda i isti u roku od tri dana, od dana otvaranja, dostavila ponuđačima. Postupak je dalje nastavljen u smislu pregledanja dokumentacije priložene uz ponude, a u cilju ocjenjivanja ponuđača, te njihove kvalifikovanosti shodno uslovima navedenim u Konkurentskom zahtjevu.

Komisija je utvrdila da ponuđači „OTIS LIFTOVI“ d.o.o. Sarajevo i „LIFTMONT“ d.o.o. Sarajevo ispunjavanju kvalifikacione uslove u pogledu lične sposobnosti, sposobnosti obavljanja profesionalne djelatnosti, ekonomske i finansijske sposobnosti, kao i tehničke i profesionalne sposobnosti. Takođe, Komisija je utvrdila da ponuđač „LIFTMONT“ d.o.o. Sarajevo ispunjava formalno-pravne uslove postavljene u Konkurentskom zahtjevu.

Komisija je uvidom u dostavljenu ponudu ponuđača „OTIS LIFTOVI“ d.o.o. Sarajevo utvrdila da je ponuda navedenog ponuđača pripremljena na način kako je traženo Konkurentskim zahtjevom („da listovi ponude moraju biti čvrsto uvezani na način da se onemogućiti naknadno vađenje ili umetanje listova“), iako nema pečat u pečatnom vosku, već je pričvršćena i zalijepljena stikerom sa pečatom ponuđača.

Tačkom 5.2. Konkurentskog zahtjeva propisano je da ponude trebaju biti otkucane ili napisane neizbrisivom tintom. Svi listovi ponude moraju biti čvrsto uvezani na način da se onemogućiti naknadno vađenje ili umetanje listova, ukoričeni u knjigu ili uvezani jemstvenim koncem sa otiskom pečata u pečatnom vosku (treba onemogućiti ispadanje jemstvenika iz pečatnog voska dodatnim ojačanjem ljepljivom trakom jemstvenika, pije ili poslije pečatnog voska). Naime, Agencija je Konkurentskim zahtjevom propisala način pripremanja ponude, uvažavajući stav Agencije za javne nabavke Bosne i Hercegovine, gdje se „pod čvrstim uvezom podrazumijeva ponuda uvezana odnosno ukoričena u knjigu ili ponuda osigurana jemstvenikom čija su oba kraja na prvoj ili posljednjoj strani pričvršćena utisnutim žigom ili naljepnicom ovjerenom pečatom ponuđača, s ciljem izbjegavanja manipulisanja stranicama ponude“, a u vezi sa članom 58. stav (2) Zakona i članom 8. stav (2) Uputstva za pripremu modela tenderske dokumentacije i ponuda („Službeni glasnik BiH“, br. 90/14 i 20/15).

Dakle, suština čvrstog uvezivanja ponuda je da se pokuša osigurati da se ponuda ne „rasipa“ odnosno da se stranice ponude ne mogu izvlačiti ili mijenjati, što podrazumijeva da je ponuda ukoričena u knjigu i osigurana jemstvenikom, te je u tom smislu Komisija i prihvatila ponudu ponuđača „OTIS LIFTOVI“ d.o.o. Sarajevo. Takođe, ističemo da je članom 3. Zakona propisano da je „Ugovorni organ dužan poduzeti sve potrebne mjere, kako bi se osigurala pravična i aktivna konkurencija među potencijalnim ponuđačima, uz ostvarivanje jednakog tretmana, nediskriminacije i transparentnosti, što u konačnici podrazumijeva primjenu istih uslova za sve učesnike u postupku javne nabavke“.

Imajući u vidu naprijed navedeno, Komisija je utvrdila da ponuda ponuđača „OTIS LIFTOVI“ d.o.o. Sarajevo ispunjava formalno-pravne uslove postavljene u Konkurentskom zahtjevu.

Kako je Konkurentskim zahtjevom za postupak javne nabavke usluga održavanja liftova za potrebe Agencije predviđeno provođenje e-aukcije u skladu sa Pravilnikom, da su zaprimljene dvije prihvatljive ponude, Komisija je zakazala e-aukciju za dan 03.08.2021. godine sa početkom u 10,00 sati u trajanju od 10 minuta.

Prema Izvještaju o toku i završetku e-aukcije od 03.08.2021. godine, Komisija je sačinila konačnu rang listu ponuđača koji su učestvovali u postupku e-aukcije, kako slijedi:

R/B	Naziv ponuđača	Konačna cijena bez uračunatog PDV-a
1.	„LIFTMONT“ d.o.o. Sarajevo	945,00 KM
2.	„OTIS LIFTOVI“ d.o.o. Sarajevo	960,00 KM

Nakon provedenog postupka e-aukcije, shodno Izvještaju o toku i završetku e-aukcije od 03.08.2021. godine, Komisija je utvrdila da je bilo snižavanje cijena ponuda kao kriterij za dodjelu ugovora u skladu sa članom 8. Pravilnika.

Komisija je utvrdila da je ponuda ponuđača „LIFTMONT“ d.o.o. Sarajevo u iznosu od 945,00 KM ocijenjena kao najpovoljnija ponuda i da ne premašuje procijenjenu vrijednost javne nabavke.

Imajući u vidu naprijed navedeno, prihvaćena je preporuka iz Izvještaja o radu Komisije i odlučeno da se ugovor na period od dvije godine dodijeli ponuđaču „LIFTMONT“ d.o.o. Sarajevo, kako je navedeno u članu 1. ove odluke.

**Pouka o pravnom lijeku:** Protiv ove Odluke može se izjaviti žalba Uredu za razmatranje žalbi Bosne i Hercegovine, u roku od pet dana od dana dostavljanja iste. Žalba se podnosi putem Državne agencije za istrage i zaštitu.

Na izjavljenu žalbu ponuđač je obavezan platiti naknadu u skladu sa članom 108. Zakona o javnim nabavkama.

DOSTAVLJENO:

- Ponuđačima 2x;
- Sektoru za mat.-fin. poslove;
- a/a.



DIREKTOR  
GLAVNI GENERALNI INSPEKTOR POLICIJE

Darko Čulum